

TSE LOKELANG HO ETSAHALA HO LATELA QETO YA LETONA LA DITJHELETE YA HO KGINA VAT

Tshwane, 25 Mmesa 2025 – Khomishenara ya Ditshebeletso tsa Lekgetho tsa Afrika Borwa (SARS), Mong. Edward Kieswetter, o hlokometse qeto ya Letona la Ditjhelete, Mong. Enoch Godongwana ya ho kgina keketseho ya 0.5% ya VAT e neng e rerilwe, eo ho neng ho lebelletswe hore e qale ho sebetsa ka la 1 Motsheanong 2025. Qeto ena e na le ditlamorao tse kgolo bakeng sa barekisi ba VAT le baji. Jwalo ka motsamaisi wa mehato yohle e mabapi le lekgetho naheng ka bophara, SARS e tla nnetefatsa hore ditekolobotjha tse hlokehang di feela di etswa ho bapa le phetoho ena.

Hodima moo, Khomishenara o ananela hore barekisi le baji ba entse matsapa a ho lokisetsa keketseho ena ya VAT (Lekgetho la Boleng bo Ekeditsweng) ka nako eo ho neng ho na le qequeo tse mabapi le dipuisano tsa Palamente mmoho le maikutlo a setjhaba.

Ho bapa le bophatlalatsi ba ditaba ba Letona moo a tsebisang ka ho kginwa ha keketseho ya sekgahla sa VAT mmoho le ho phatlalatswa ha Tsebisano ya Nomoro ya 6157 ya la 24 Mmesa 2025, le ho tsebiswa Palamenteng ha Dikgagla le Bokaalo ba Ditjhelete mmoho le Bili ya Tlhophisobotjha ya Melao ya Pokello ya Lekgetho, eo ho lebelletsweng hore e tjhaelwe monwana ke Palamente, mehato ena e latelang e tla sebetsa ho barekisi bohle ba VAT ho tloha ka la 1 Motsheanong 2025:

1. Barekisi ba VAT ba sokang ba phethahatsa phetoho ena ya sekgahla, ba tlameha ho emisa tsohle tse mabapi le sena.
2. Barekisi ba lebelletswe ho sebetsa VAT ho latela sekgahla sa 15% e seng sa 15.5% bakeng sa dithoto le ditshebeletso ho bapa le Molao wa VAT. Barekisi ba ka sebedisa nako ena e kgutshwane ho hlophisa mekgwatshebetso ya bona botjha le ho tlaleha le ho lefa VAT.
3. Ebang morekisi a sa kgone ho kgutlela sekgahleng sa 15%, ka lebaka la diphetoho tse tshopodi tsa mokgwatshebetso tse lokelang ho etswa, diphepelo le ditheko tse jwalo di tlameha ho tlalehwa le ho ballwa ka sekgahla sa 15.5% ho fihela ka nako eo ditlhophisobotjha tsa mokgwatshebetso di phethelwang ka yona ho eso fete la 15 Motsheanong 2025.
4. Ditransekhene tsa VAT tse ileng tsa lefiswa 15.5% di tlameha ho tlalehwa sekgeong sa 12 (sa lekgetho la boleng bo ekeditsweng) mmoho le sekgeong sa 18 (lekgetho la ditjeo tsa hao) kgutlisong ya VAT.
5. Ditlhophisobotjha tse sebopehong sa dipusetso tsa sekgahla sa 0.5% ho baji ho tswa ho bafepedi le tsona di tlameha ho tlalehwa ka ho lekana dikgeong tsa 12 le 18 ka ho fapana.

6. Ditsebahatso tse entsweng kgutlisong ya VAT di tla nkelwa hloohong nakong eo ho etswang dinnnetefatso le/dioditi dinakong tse amehang tsa VAT.
7. Dikgutliso tsa VAT tse loeklang o nyehelwa di tla tswela pele ho sebetswa palo ya VAT ka tshebediso ya sekgahla sa 15% ho tloha dinakong tsa lekgetho kapa dikgweding tse qalang ka la 1 Motsheanong 2025.
8. Barekisi ba seng ba phethahaditse diphetoho tsa dikgahla ka bobedi le tsa Ha Ho Letho (Zero-Rating) ba kgothaletswa ho kgina diphetoho tseo pele ho la 1 Motsheanong 2025.

Khomishenara Edward Kieswetter o boletse hore “o utlwisisa botshopodi le pherekano e bakilweng ke motjha ona. SARS e tla etsa tsohle tse matleng a yona ho fana ka tlhakisetsa e fetang ena le ho tlisa nnetefaletso ya boitlamo ho barekisi bohle.”

Ho fumana lesedi le fetang lena, ka kopo ikopanye le SARSMedia@sars.gov.za.